

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 बुधवार

दिनांक 29.05.2024

प्रमुख समाचार –

- 1— बेमेतरा जिला के बेरला म होय विस्फोट के बाद कंपनी म उत्पादन अउ आने काम—काज उपर लगाय गीस रोक – विस्फोट के जांच बेरला एसडीएम पिकी मनहर ह करही ।
- 2— बीजापुर जिला म आज सुरक्षा बल मनके संग मुठभेड़ म दू माओवादी मारे गीस – सुकमा जिला म पुलिस ह पांच लाख रूपिया के इनामी महिला माओवादी ल करीन गिरफ्तार ।
- 3— रईपुर जिला के खमतलाई म एक ठिन फोम फैक्ट्री म आगी लगे ले दू झिन माईलोगिन करमचारी के मउत ।

अब समाचार विस्तार ले ...

बारूद फैक्ट्री विस्फोट—न्यायिक जांच

बेमेतरा जिला के बेरला म पाछु पच्चीस मई के बारूद फैक्ट्री म होय विस्फोट के बाद स्पेसल ब्लास्ट लिमिटेड कंपनी म उत्पादन अउ आने काम—काज उपर अवइया आदेस तक रोक लगादे गेहे । ए बारे म बेमेतरा कलेक्टर रणवीर शर्मा ह आदेस जारी करके यहू केहे हे कि फैक्ट्री के अंदर विस्फोटक जिनिंस के सुरक्षा के जुवाबदारी फैक्ट्री प्रबंधन के होही । इही बीच बारूद फैक्ट्री म होय मामला के न्यायिक जांच के आदेश कलेक्टर रणवीर शर्मा ह देहे । ए विस्फोट के जांच बेरला एसडीएम पिकी मनहर ल सौंपे गेहे ।

कलेक्टर ह पैतालीस दिन म ए मामला के जांच करके प्रतिवेदन पेस करे के निरदेस दे हवय। कलेक्टर ह जांच बर चार ठिन बिन्दु राखे हे, जेमा विस्फोट के कारण, फैक्ट्री प्रबंधन डहार ले करे गे सुरक्षा उपाय के जांच, विस्फोट म कौनों प्रकार के लापरवाही होय हे, त ओखर जिम्मेवारी काखर होही, ए जम्मा बिन्दु उपर जांच करे जाही। ए घटना म मारे गे अउ लापता लोगन मन ल लेके प्रसासन कोति ले जारी आंकड़ा ल गांव के लोगन मन ह खारिज कर देहे। सरकार के मुताबिक ए हादसा म एक झिन मजूर के मउत होय हे अउ आठ झिन श्रमिक मन ल लापता बताय गेहे। संगेसंग आठ झिन मजूर मन ल घायल बताय गेहे।

ऐति, नेता प्रतिपक्ष डॉक्टर चरणदास महंत ह बारूद फैक्ट्री म होय विस्फोट के घटना उपर किहीन कि राज्य सरकार के लापरवाही के सेति ए दुर्घटना होय हे। डॉक्टर महंत ह मृतक के परिवार मन ल एक-एक करोड़ रुपिया के मुआवजा देके संगेसंग परिवार के एक झिन सदस्य ल नौकरी म राखे के मांग करीन हे।

माओवादी मुठभेड़/गिरफ्तार

बीजापुर जिला म आज सुरक्षा बल मनके संग होय मुठभेड़ म एक झिन माईलोगिन के संग दू झिन माओवादी मारे गीस। जिला के पुलिस अधीक्षक जितेन्द्र यादव ह बतईन कि ए मुठभेड़ महेड़ थाना क्षेत्र के बहेपारा के जंगल म आज बिहनिया होइस। मुठभेड़ म मारे गे महिला माओवादी उपर आठ लाख रुपिया के इनाम घोसित करे गे रिहीस। पुलिस ह घटना वाले जघा ले मारे गे दूनों माओवादी के सव के संगेसंग दू ठन हथियार घलो बरामद करे हे।

त उहें, सुकमा जिला म पुलिस ह पांच लाख रुपिया के एक झिन इनामी महिला माओवादी ल गिरफ्तार करे हे। जिला के पुलिस अधीक्षक किरण चव्हाण ह बतईन कि ए वर्दीधारी माओवादी मलांगीर एरिया कमेटी के डॉक्टर टीम के कमांडर बताय जावत हे।

मतगणना-तैयारी

लोकसभा चुनई म छत्तीसगढ़ के संगेसंग देस म चार जून के होवइया मतगणना के तियारी अब आखिरी चरण म हवय। निर्वाचन आयोग डहार ले वोट ल गिने के काम म लगे अधिकारी अउ करमचारी मन ल प्रसिक्षण दे जावत हे। इही कड़ी म कोंडागांव म मतगणना सहायक, पर्यवेक्षक, माईक्रो आब्जर्वर अउ

टेबुलेटर मन ल प्रसिक्खण देके संगेसंग मतगणना के काम के बारीकी के बारे म बताय गीस। प्रसिक्खण के दउरान मत मनके गणना, वीवीपैट स्लिप गणना, मतगणना सिराय के बाद ईवीएम अउ निर्वाचन जिनीस मन ल मुहरबंद करे के बारे म जानबा दे गीस।

जिला के अपर कलेक्टर अउ उप जिला निर्वाचन अधिकारी चित्रकांत चार्ली ठाकुर ह किहीन कि मतगणना के बारे म कोनों प्रकार के संसो होय उपर ओखर निराकरण जरूर करयं। मत के गिनती सुरु होय के पहिली मउका म उपस्थिति उम्मीदवार अउ उंखर अभिकर्ता मन ल निर्वाचन आयोग ले मिले दिसा—निरदेस के जानबा दे बर किहीन।

आगजनी

रईपुर जिला के खमताराई म एक ठिन फोम फैक्ट्री म आगी लगे ले दू झिन माईलोगिन करमचारी के मउत हगे। फायर ब्रिगेड के टीम ह मउका म पहुंच के आगी बुताय म लगे हे। आगी कइसे लगिस एखर बारे म जानबा नइ मिल पाय हे।

ओति, जगदलपुर म स्थित एक ठिन कपड़ा के दुकान म आगी लग गे। आगी लगे ले तीर—तखार के दुकान मन ह घलो एखर चपेट म आगे। सूचना मिलतेच आगी बुझइया गाड़ी ह मउका म जाके आगी उपर काबू पाइन। फेर, दुकान म आगी लगे ले दुकान म रखे समान अउ दुकान के बाहिर खड़े एक ठिन कार अउ फटफटी ह जर के राख हगे हे।

गरियाबंद—गबन मामला

गरियाबंद जिला के मैनपुर स्वास्थ्य केंद्र म तीन करोड़ तेरह लाख रुपिया ले जादा के गबन के मामला म आरोपी ग्यारह अधिकारी—करमचारी मनके खिलाफ पुलिस कार्रवाही चलत हे। ए मामला म स्वास्थ्य विभाग के पूर्व लिपिक वीरेंद्र भंडारी ल गिरफ्तार करके जेल भेज दे गेहे।

जानबा के मुताबिक मैनपुर स्वास्थ्य केंद्र म तनखा के आने—आने फायदा के नाव उपर जिला कोषालय ले मिलके तीन करोड़ तेरह लाख रुपिया ले जादा के पइसा निकाल ले गे रिहीस। ए मामला म जिला प्रशासन ह जांच के बाद मैनपुर थाना म प्रतिवेदन पेस करके कार्रवाई के मांग करे रिहीस।

किर्गिस्तान—घर वापसी

किर्गिस्तान के राजधानी बिश्केक म मेडिकल के पढ़ाई करे बर गे छात्र-छात्रा मनके ए बेरा भारत वापसी होवत हे। इही कड़ी म छत्तीसगढ़ के गौरेला-पेण्ड्रा-मरवाही जिला के छात्रा आयशा राय घलो सामिल हे।

जानबा के मुताबिक पाछु दिन किर्गिस्तान म आम लोगन अउ दूसर देस के पढ़ईया छात्र मनके बीच विवाद बाढ़े ले तनाव जइसन स्थिति सुरु होगे रिहीस, जेखर बाद छात्र-छात्रा मन ह वीडियो जारी कर भारत सरकार ले मदद के गुहार लगाय रिहीन।

सुनील शर्मा-राज्यपाल परिसहाय

राज्य सासन ह भारतीय पुलिस सेवा के बछर दू हजार सत्रह बैच के अधिकारी अउ सहायक पुलिस महानिरीक्षक सुनील कुमार शर्मा ल राज्यपाल के परिसहाय के पद म अवइया आदेस तक नियुक्त करे गेहे। ए बारे म गृह विभाग डहार ले आदेस जारी कर दे गेहे।

आपराधिक कानून-प्रशिक्षण

देसभर म एक जुलाई ले लागू होवइया तीन ठिन नवा आपराधिक कानून ल लाय बर कोरिया जिला म पुलिस अधीक्षक सूरज सिंह परिहार के निरदेस उपर थाना प्रभारी मन ह जांच अधिकारी मन ल प्रशिक्षण दीस। प्रशिक्षण सत्र के पहिली चरण म जिला ले पचीस विवेचक मन सामिल होइन। प्रशिक्षण म बताय गीस हे कि तीन ठिन नवा कानून के बारे म छत्तीसगढ़ पुलिस के अधिकृत वेबसाइट म एखर बारे म पूरा जानबा दे गेहे।

होटल-कार्रवाई

रईपुर नगर-निगम ह राजधानी रईपुर के वीआईपी रोड स्थित एक ठिन प्राइवेट होटल डहार ले पैतालिस सौ वर्ग फीट उपर करे गे अवैध कब्जा ल तोड़ देहे। निगम अधिकारी संतोष पांडेय ह बतइन कि ए होटल के तीर विधायक कॉलोनी हे, होटल प्रबंधन डहार ले इंहा ले निकले नाला उपर कब्जा करे के सेति नाला के पानी ह विधायक कॉलोनी म घुस जथे। सिकइत के बाद नगर-निगम के टीम ह कार्रवाई सुरु कर देहे।

शोएब ढेबर-एफआईआर

राजधानी रईपुर के सिविल लाइन्स थाना म अनवर ढेबर के बेटा शोएब ढेबर अउ एक झिन अन्जान वकील के खिलाफ मामल दरज करे गेहे। एखर मन उपर आरोप हे कि एमन कथित सराब घोटाला मामला के गवाह ल ईओडब्ल्यू ऑफिस के तीर रोक के धमकी दीन। ए मामला म पुरानी बस्ती थाना म घलो एफआईआर दर्ज कराय गेहे, जेमा अनवर ढेबर ल घलो आरोपी बनाय गेहे।

मौसम

अउ अब पेस हे मौसम के हाल...

दक्षिण-पश्चिम मानसून के अवइया चौबीस घंटा म केरल म पहुंचे बर स्थिति बनत हे। मौसम विभाग ले मिले जानबा के मुताबिक इकतीस मई तक प्रदेश म मौसम के सुष्क बने रहे के संभावना बताय गेहे। एक टिन द्रोणिका उत्तर-पश्चिम उत्तर प्रदेश ले पश्चिम बंगलादेस तक बने हे। उत्तर -पश्चिम ले अवइया गरम अउ सुष्क हवा के सेति मध्य अउ उत्तर छत्तीसगढ़ म अवइया दू दिन तक जोरदरहा गर्मी पड़े के संभावना हवय।

मुंगेली जिला म काली प्रदेश के सबले जादा तापमान सैंतालीस डिग्री सेल्सियस दरज करे गीस, त उहे, बिलासपुर म छियालिस दसमलव छै अउ रईपुर म पैतालिस दसमलव आठ डिग्री सेल्सियस दर्ज करे गीस।

इही बीच, चरचरावत घाम अउ लू ले बांचे बर गौरेला-पेण्ड्रा-मरवाही जिला के कलेक्टर लीना कमलेश मंडावी ह लोगन मन ले जरूरी सावधानी बरते के अपील करे हे। जम्मों स्वास्थ्य केंद्र मन म दवाई मन के बेवस्था करे के घलो निरदेस देहे।

